

采芳隨筆卷十二

北平查 彬伯塾輯

蓮花潔品也即芙蕖花爾雅云荷芙蕖一作扶渠一作夫

渠一名荷花一名水芙蓉又名草芙蓉一名水芝按蕖菜茨

實俱名一名水芸一名澤芝一名水旦一名容華一名

水華一名菡萏已發為芙蕖未發為菡萏詩正義云菡萏一作荅蕒又號玉環張

敏叔以為淨客曾端伯以為浮友又呼淨友稱之曰水

花魁比之則曰花君子唐明皇指為解語花又有梅弟

凌波仙妙法華等目花經蓮花三品七命花惟紅白二

色最多白者香紅者艷華實齊生百節踈通有重臺蓮

並頭蓮

一名嘉蓮一名華萃一名同心蓮一品蓮一本三萼四面蓮周

共四 萼 灑金蓮

金邊蓮衣鉢蓮千葉蓮黃蓮金蓮分香蓮

分枝荷

一名低夜舒荷一名望紅蓮睡蓮四季蓮等目

他如佛座蓮金鑲玉印蓮斗大紫蓮碧蓮錦邊蓮諸品

尤為絕勝漢昭帝時有紫色芙蓉蘓環詩有緗荷

即今蜜荷

神境記九疑山有黃色蓮壯夢瑣言湖州有青蓮佛書

云芬陀利花白蓮花也優鉢羅花青蓮花也波頭摩花

赤蓮花也學圃餘疏蘓州有百子蓮碧臺蓮拾遺記周

穆王時有冰荷霍光有五色睡蓮

南海有之

宋興國玉津園

有合歡之瑞蓮太華峰有玉井蓮洞冥記釣影山有紫

河中有寒荷一統志儋州有四季荷臘月尤盛枕中書
玉京七寶山芝沿中蓮花徑度十丈關令尹喜生時其
家陸地生蓮花又皆蓮之異種也荷葉曰翠蓋蓮實曰
的藪一曰玉蛹一曰葇又名湖目又名藕實房曰青房
藕名雨草一名白藕一名玉玲瓏一名玉臂龍一名西
子臂鬚名佛座鬚荷葉可以為衣通柄盛酒名曰碧筒
杯以杯置花中飲之名曰解語杯周子愛蓮說有云予
獨愛蓮之出淤泥而不染濯漣漪而不妖中通外直不
蔓不枝香遠益清亭亭淨植可遠觀而不可褻玩焉樂
天荷珠賦句云灑之不著湛子逾淨時寄寓於傾歌每

因依于平正可止則止必荷之中央在圓而圓得水之
之本性梁沈休文約新荷應詔云勿言草卉賤幸宅天
池中微根纔出浪短幹未搖風寧知寸心裏蓄紫復含
紅吳均採蓮云錦帶雜花鈿羅衣垂綠川問子今何去
出採江南蓮遼西三千里欲寄無因緣願君早旋反及
此荷花鮮隋辛德源詩云洛神挺凝素文君拂豔紅麗
質徒相比鮮彩兩難同光臨照波日香隨出岸風涉江
良自遠託意在無窮唐盧昇之照隣詩云浮香繞曲岸
圓影覆華池常恐秋風早飄零君不知王子安勅採蓮
曲云採蓮歸綠水芙蓉衣秋風起浪鳧雁飛桂櫂蘭橈

下長浦羅裙玉腕輕搖櫓葉嶼花潭極望平江謳越吹
相思苦相思苦佳期不可駐塞外征夫猶未還江南採
蓮今已暮採蓮花渠今那必盡娼家官道城南把桑葉
何如江上採蓮花蓮花復蓮花花葉何稠疊葉翠本羞
眉花紅強似頰佳人不在茲悵望別離時牽花憐共蒂
折藕愛連絲故情無處所新物徒華滋不惜西津交珮
解還羞北海鴈書遲采蓮歌有節采蓮夜未歇正逢浩
蕩江上風又值徘徊江上月徘徊蓮浦夜相逢吳姬越
女何處尋共問寒江千里外征客關山路幾重太白古
風云碧荷生幽泉朝日艷且鮮秋花冒綠水密葉羅青

烟秀色空絕世馨香竟誰傳坐看飛霜滿凋此紅芳年
結根未得所願託華池邊又採蓮曲云若耶溪傍採蓮
女笑摘荷花共人語日照新妝水底明風飄香袂空中
舉岼上誰家遊冶郎三三五五映垂楊紫駟嘶入落花
去見此踟躕空斷腸戎虔州昱採蓮曲云雖聽採蓮曲
詎識採蓮心漾櫂愛花遠回船愁浪深烟生極浦色日
落半江陰同侶憐波靜看妝墮玉簪劉河南方平採蓮
歌云落日晴江裏荆歌艷楚腰採蓮從小慣十五即乘
潮李公垂紳重臺蓮云綠荷舒卷涼風曉紅萼開繁紫
萼重雙女漢臯爭笑臉二妃湘浦竝愁容自含秋露貞

姿潔不曉春妖艷態穠終恐玉京仙子識却持歸種碧
池中郭煥威詩云臉膩香薰似有情世間何物比輕盈
湘妃雨後來池看碧玉盤中弄水晶昌黎句云從今有
雨君須記來聽蕭蕭打葉聲張承吉句云摘蓮拋水上
郎意在浮花姚秘書合詩云露荷迎曙發灼灼復田田
乍見神應駭頻來眼尚顛光凝珠有蒂焰起火無煙粉
膩黃絲蕊心重碧玉錢日浮秋轉麗雨灑曉彌鮮醉豔
酣千朶愁紅思一川綠莖扶萼正翠葯滿房圓淡暈還
殊衆繁英得自然高名猶不厭上客去爭先景逸傾芳
酒懷濃習綵牋海霞寧有態蜀錦不成妍客至應消病

僧來欲破禪晚多臨水立夜只傍堤眠金似明沙渚鐙
疑宿浦船風驚叢乍密魚戲影微偏穠彩燒晴霧殷姿
擷碧泉畫工投粉筆宮女棄花鈿鳥戀驚難起蜂偷困
不前繞行香爛漫折贈意纏綿誰記江南曲風流合管
絃義山詩云都無色可並不奈此香何瑤席垂涼設金
羈落晚過迴衾燈照綺渡襪水沾羅預想前秋別離居
夢擢歌飛卿詩云綠塘搖艷接星津軋軋蘭橈入白蘋
應為洛神波上韞至今蓮蕊有香塵又張靜婉采蓮曲
云蘭膏墜髮紅玉春燕釵拖頸拋盤雲城西楊柳向嬌
晚門前溝水波粼粼麒麟公子朝天客珂馬璫璫度春

陌掌中無力舞衣輕剪斷鮫綃破春碧抱月飄煙一尺
腰麝臍龍髓憐嬌繞秋羅拂水碎光動露重花多香不
銷鵝鴨交交塘水滿綠萍金粟蓮莖短一夜西風送雨
來粉痕零落愁紅淺船頭折藕絲暗牽藕根蓮子相留
連郎心似月月易缺十五十六清光圓李文山羣玉蓮
葉云根是泥中玉心承露下珠在君塘下種埋沒任春
蒲又新荷云田田八九華散點綠池初嫩碧纔平水圓
陰已蔽魚浮萍遮不合弱荇繞猶踈半在春波底芳心
卷未舒吳子華白蓮云白玉花開綠錦池風流御史報
人知看來應是雲中墮偷去須從月下移已被亂蟬催

晚晚更禁涼。雨動襜褕。習家秋色堪圖畫。只欠山公倒
接羅。賈暮芙蓉出水。云的皪舒芳艷。紅姿映綠蘋。搖風
開細浪。出沼媚清晨。翻影初迎日。流香暗襲人。獨披千
葉淺。不競百花春。魚戲參差動。龜遊次第新。涉江如可
採。從此免迷津。陸魯望詩云。閒吟鮑昭賦。更起屈平愁。
莫引西風動。紅衣不耐秋。又白蓮云。素蘂多蒙別艷欺。
此花真合在瑤池。還應有恨無人覺。月曉風清欲墮時。
又白芙蓉云。澹然相對却成勞。月染風裁箇箇高。似說
玉皇親謫墮。至今猶著水霜袍。皮襲美重臺蓮花云。歌
紅。矮嬈力難任。每葉頭邊半米金。可得教他水妃見。兩

重原是一重心崔湘颺櫓句云留樣最嗟無巧筆護香
長為惜薰籠劉魚蓮塘霽望詩云新秋菡萏發紅英向
晚風飄渺郡馨萬疊水紋羅乍展一雙鷺鷥繡初成採
蓮女散吳歌闋拾翠人歸楚雨晴遠岸牧童吹短笛蓼
花深處信牛行孫光憲採蓮云菡萏香連十頃陂小姑
貪戲採蓮遲晚采弄水船頭溼更脫紅裙裹鴨兒宋楊
大年詩云翠幄飄香映綺襦鈿盃清曉露成珠休啼為
近鮫人室欲笑誰投玉女壺雲氣乍迴巫峽夢水嬉猶
記曲池圖金花却薦何人步枉遣凌波韞縠濡又白蓮
云昨夜三更裏嫦娥墮玉簪馮夷不敢受捧出碧波心

又詩云舒女清泉滿黃姑別渚通巴天迷峽雨楚澤映
江楓思逐鮫絲亂香愁翠被空灑從瓊蕊露吹任石尤
風怨淚連疎竹私書託過鴻雙魚應共戲休問葉西東
錢思公惟演詩云欲網珊瑚碧浪深橫塘斜日帶秋陰
漢宮此地留金餅洛浦何人遺錦衾舞學西城回雅態
歌傳南國有餘音韓憑恨魄如長在青骨香銷亦見尋
又詩云唾露金銷月似霜雲屏玉輦剩秋光不知惟有
高唐夢翠被華鐙徹曙香又詩云水濶雨瀟瀟風微影
自搖徐孺羞半面楚女妬纖腰別恨拋深浦遺香逐畫
橈華鐙連霧夕鈿合映霞朝淚有鮫人見魂須宋玉招

凌波終未渡疑待鵲為橋丁晉公謂詩云夢散高唐夜
正遙楚天何處不無慆秋風似會荆王意露渚煙汀養
細腰胡武平新荷云一夜抽輕蓋平明映曲池水涼魚
未覺烟淨鳥先窺露重心猶卷風多柄尚危東林應結
社只待素華披杜祁公衍詩云鑿破蒼苔漲作池芰荷
分得綠參差曉開一朵烟波上似畫真妃出浴時又雨
中荷花云翠蓋佳人臨水立檀粉不勻香汗濕一陣風
來碧浪翻珍珠零落難收拾韓魏公詩云清香奇色匝
芳洲只得公餘一見休道是好花堪謔問幾時曾上美
人頭又榮歸堂觀蓮戲成云風捲蓮香不斷頭田田荷

影動清流紅苞密障魚鷹坐綠蓋低容水馬遊時折嫩
梢供玉箸更裁圓葉代金甌何如滿艦傾醇酎醉向花
前打拍浮歐陽文忠句云空留此日田田葉不見當年
步步入又荷葉云池面風來波濤灩陂間露下葉田田
誰於水上張青蓋罩却紅妝唱採蓮梅聖俞重臺蓮云
彤雲赤霧生綠房朝霞變蕊珠粉光白玉入泥不滿盞
羽蓋衰露明月璫濁水一石亂鼃鼃鑿池五丈如斗方
萍根科斗得自在荷芰明年出水央王半山鍾山西菴
白蓮亭云山亭新破一方苔白帝留花滿四隈野艷輕
明非傳粉秋光清淺不憑材鄉窮自作幽人伴歲晚誰

為靜女媒可笑遠公池上客却因松菊賦歸來邵子並
蒂蓮云漢室嬋娟雙姊妹天台縹緲兩神仙當時儘有
風流過摘向人間作瑞蓮東波橫湖云貪看翠蓋擁紅
妝不覺湖邊一夜霜卷却天機雲錦段從教足練寫秋
光又和文與可洋州園池菡萏亭云日日移牀趁下風
清香不盡思何窮若為化作龜千歲巢向田田萬葉中
又詩云湖上棠陰手自栽問公更得幾回來水仙亦恐
公歸去故遣雙蓮一夜開詔書行捧縷金箋樂府應歌
相府蓮莫忘今年花發處西湖西畔北山前子由盆池
白蓮云白蓮生淤泥清濁不相干道人無室家心跡兩

蕭然我住西湖濱蒲蓮若雲屯幽居常閉戶時聽遊人
言色香世所共眼鼻我亦存鄰父閔我獨遺我數寸根
淚水不入園庭有三尺盆兒童汲甘井日宴泥水溫及
秋尚百日花葉隨風翻舉目得秀色引息收清芬此心
湛不起六塵空過門誰家白蓮花不受風霜殘徐仲車
白蓮云水一重重玉一重更無妖色媚西風雖然物外
能為素又恐人間只愛紅又芰荷歌云孔雀團花翡翠
鈿青皇批盡買花錢滌魚飛膽大如拳琉璃瓦墜紫微
天湘妃曲譜誰可傳彩毫不動斜卷牋我家食客常三
千杯盤一樣青瑤圓麻姑下來尋水仙不見波瀾只見